

Ester ladins, se sentí ladins

Ai Di d'Unité Ladina ai 14 de messel 2018 sun Pordù el vegnù recordé les does personalités ladines Danilo Dezulian de Fascia y Benigno Pellegrini de Fodom, prejenté l liber documentar sun i Ladins a Neudrossenfeld (2017) y porté dant argomenc y programs importanc per les Unions di Ladins dles cinch valedes



L ciar dla Union Generela di Ladins dla Dolomites, da man dreta: la presidenta Milva Mussner, la vizepresidenta Manuela Ladurner y l vizepresident Fernando Brunel.

Attualité/1 - L "Di d'Unité Ladina" en gaujion dl di storich di Ladins sul jouf dl Sela ai 14 de messel é diventé oramai na ocajon voluda y sentuda per duc i ladins de se abiné adum, cialé derevers y inant, prejenté chesta y chela outra idea y valch projet per l davegni. Al zenter stá la unité y la enconteda di ladins de vigni vers, te cer aspec saurida da mené inant (cultura y sozjal), te d'autri utopica (politica y organizazion dl teritore). La gran euforia per na unificazion ladina aministratif-politica n'é al moment nia da conesce, ma la vueia y motivazion da laoré a una soura i confins fora resta. Sun Pordù an podù vedei y audi l spirit ladin, chel che nase fora dai valours tradizionai y ti dá fle a val' tiza de renasciment che dá speranza per l davegni y les generacions che vegn.

La presidenta dla UGLD-Union Generela di Ladins dla Dolomites Milva Mussner á podù saludé en chest domesdi d'isté l president d'onour dla UGLD Carlo Willeit y le cumember d'onour Lois Craffonara, spo les autorités dal mond politich Leandro Grones (ombolt de Fodom) y Elena Testor (senatoura a Roma y sourastanta dl Comun general de Fascia), deplù raprejentanc de istituzions importantes per i Ladins sciche l Istitut Ladin Micurá de Rù, l Istitut Cultural Cesa de Jan da Col, l Istitut Ladin Majon di Fascegn, la Università de Bulsan-Persenon y ence dal mond dla scola ladin. Prejentes samben

dutes les Unions di Ladins, che é la basa y les componentes dla Generela.

Les onoranzas y la comemorazion

L'UGLD á volú recordé en chest di con n moment de chiet l om de mujiga y cultura Benigno Pellegrini de Fodom. Per plu che 50 agn da ciantarin y spo diretour dl cor de glieja S. Iaco de La Plie da Fodom, óvel abú metù en pe dl 1972 l Coro Fodom. Per si impegn fort tl ciamp musical y cultural de sia val fovel vegnù nominé de messel dl 2017 cumember d'onour dla Union Generela di Ladins dla Dolomites.



L cuertl dl liber nuef dal titul "Pedies tla Ladinia".

Ai 15 de jujn 2018 nes ál lascé a l'eté de 91 agn.

L'Union di Ladins de Fascia tres si president Fernando Brunel á volú tó la ocajon de recordé - avisa iló tl Albergo Maria - Danilo Dezulian de Fascia (ciala articulet a pert a plata 39).

Les Unions di Ladins y sies attivitàs

Na bona idea é steda chela da prejenté sun Pordù en curt les Unions di Ladins de Ampez, Fodom-Col, Fascia, Gherdeina y dla Val Badia. Con la moderazion de Monica Cigolla á vigni union volú prejenté n si argoment: val' iniziativa nueva y interessanta, valch aspet cultural carateristich de sia val. Ampez á prejenté la scumenciadia dl "Mercui de ra cultura ladina", che vegn tegnida tres l'isté per i sciori. Al é na poscibilité efizienta de mostré l paisc ampezan, sia storia y si lingaz ladin.

L'Union di Ladins de Fodom-Col á metù si azent sun les festivitàs religioses d'aisciuda a Col: Pasca de Mei, Les Antles y Cuer de Gejú. L cor di joegn ciantarins de glieja á porté dant deplù toc tradizionai che vegn ciantés dutorela. Al é usanza, samben, ma nia demé: valours che carateriseia la comunità de paisc, lieia adum y porta inant les cherdenez trasmetudes y passedes da generazion a generazion.

L'Union di Ladins de Fascia á pensé

va inant a plata 3

Ester ladins, se sentí ladins

Al Di d'Unité Ladina ai 14 de messel 2018 sun Pordou el vegnù recordé les does personalités ladines Danilo Dezulian de Fascia y Benigno Pellegrini de Fodom, prejenté l liber documentar sun i Ladins a Neudrossenfeld (2017) y prejenté argomenc y programs importanc per les Unions di Ladins dles cinch valedes

va inant da la pruma plata

de mete si azent sun l "valour storich dles istituzions d'aldidancuei". L professour y storich fascian Cesare Bernard á conté sun la valuta dles

comunités (de vejinanza y de val) y dles "regoles" ti temps medievai, modiei che s'á trat fora per secui con efizienza per i laours comuns, les amministrazions y i sentadins. L'amministrazione y organizazion dl

patrimoine imobiliar é sté y resta enche te nosc temps n leam da svilupe inant. De "Poetry Slam" sciche forma nueva y plu interativa de literatura á rejoné Sofia Stuflesser en cont dla Union di Ladins de Gherdeina. "Ti

dé tēmp al tēmp" é l titul dl domesdi leterar che sará chest isté a Urtijei, con leteratura y mujiga.

La Val Badia con si president Michael Moling á porté dant le projet "puls", na plataforma de colaborazion anter les valedes, per n miour raport anter les Unions di Ladins y n veicul per se conecce miour y laoré adum deplú y plu efizientement (ciala la presentazion tl Cianton dla Union sun les plates dla Val Badia!).

Mujiga de Chëifreejazz

Bon y bel á soné a chest "Di dla Unité Ladina" l grup de Gherdeina dal inom "Chëifreejazz". Al é n grup entourn al muzist y ciantautour Raimond Irsara (che i conescion dai "Acajo") che dedicheia si repertoire al jazz, con cianties te plu lingaz.

Propostes dal publich

Per che ladines y ladins se conecce miec, podessen cherié poscibeltés y enche canai y strumenc. La UGLD organiseia da agn l festival "Cianta

con nos", l "Pelegrinaje Ladin" y encontedes culturales che á n contegnú plajoul y interessant. Aldidancuei el plu sauri de se enconté sun n "social" te internet che tla vita reala. Cie che al vuel spo ester per mobilisé persones? Idees el vegnù metú deplú sun meisa sun Pordú: p.ej. de cherié na colaborazion concreta y manifestazions anter hoteliers y ciasesdafuech - l'idea podess ester bona, dal moment che na bona speisa ladina conta deplú che na bela poesia ladina. See le bon mangé foss mefun bon de tré adum deplú i ladins? Ciuldi pa no: i implanc portamont é bele stés bogn. Spo rüven plu adum, y enche l ladin se barata plu fora. Y fora dles conescenzenz podess nasc la legriza per l lingaz y la val vejina che an trascuria massa suvenz. Demé con se conecce podonse laoré adum miec y cherié unité. Per les idees n'el degugn confins! (ir)



Deplú fotografies sun www.lausci.it



Milva Mussner.



Manuela Ladurner.



Michael Moling.



Sofia Stuflesser.



Paola Agostini.



Francesca Dipol.



Leandro Grones.



Elena Testor.



L storich Cesare Bernard.



La moderadoura Monica Cigolla.



Cotanta la jent ruveda sul jout.



L grup de mujiga Chëifreejazz.



La joneza da Col cianta l inn ladin "Bel lingaz".

En recort de Danilo Dezulian



I vizepresidenc dla Generela, Fernando Brunel de Fascia y Manuela Ladurner de Fodom, con la presidenta Milva Mussner.

Atualité/3 - Al n'è nia sté adinfal che l Di dla Unité Ladina é vegnù endrezé chesta outa tl Alberch Maria, sun Pordou.

Chest restaurant storich sul jout é defat de Giusy Dezulian, vedova de Danilo del Garber, pionier ladin che nes á lascé dl 2005, che é sté per n muie de agn president y dapó fin en ultima president de onour dl'Union di Ladins de Fascia, fondadour dla Union Autonomista Ladina, apede che ombolt de Poza, assessour dl Comprenjorie Ladin, president dl Istitut Cultural Ladin y n muie de auter.

La figura de Danilo Dezulian y l'importanza de sia azion per l stravardament dla cultura y per l reconesciment di derc di ladins de Fascia é vegnù recordé al Di dla Unité Ladina dal president dl'Union de Fascia Fernando Brunel.

Giusy s'á mostré cotant contenta de avei podú mete a disposizion sies sales per l Di dla Unité Ladina; dessegur foss sté content enche Danilo, che fova vejin ai ladins che á tout pert, con l spirit y tl retrat taché sul parei. Fernando Brunel ti á sport a Giusy n pice segn de reconescenza: na tauleta depenta da el enstes con lassú l simbol vedl dl pastet de Fascia, y dedó al recordé sie predezzessour enche con les paroles che l medem Danilo Dezulian ova scrit canche l fova amaré, mingol sciche si testament spiritual: "Recordame valch outa, no par chel che é fat de bel o de burt, o che no é fat, ma recordame demó desché un de voi, che ge á volú n gran ben a soa jent e a soa tera. Mia speranza l'é che mie spirit l posse reviver te vosc recort e tornar par n moment te mie paisc e te anter mia jent". (lg)

Pedies tla Ladinia

L Di dla Unité Ladina é sté per la Union Generela di Ladins dla Dolomites enche la ocajon per prejenté na publicazion nueva, dal titul "Pedies tla Ladinia"

Atualité/2 - L ann passé de mei á i Ladins y valgunes istituzions ladines podú se prejenté ai Dis Europeics a Neudrossenfeld tla Germania, organisés da la Fördergesellschaft für Europäische Kommunikation, en colaborazion con l Comun todesch. Te chesta ocajon particulara - coordinada da la Union Generela - á i ladins giaté na paladina europeica per mostré y conté de sia realté dant a personalités y media internazional. Te chest contest el enche sté deplú esponenc dla Ladinia che á tegnù referac sun tematiche desvalives: l publizist y ensegnant David Lardschneider, la storica Elfriede Perathoner, l avocat Lukas Plancker, l journalist Mateo Taibon, l Intendent Roland Verra y Ruth Videsott dla Universitè Ledia



Pablo Palfrader prejenté l liber nuef al Di dla Unité Ladina sun Pordou.

de Bulsan. Dal moment che chisc intervenc é enche enteressanc per nosta jent, á la Union Generela volú i abiné adum te n codejel, che á giaté l titul "Pedies tla Ladinia".

Tla publicazion curreda dal journalist Pablo Palfrader giaten duc i referac te sia verjion originala todesca, sciche enche tla verjion ladin-dolomitana. Dut cant vegn abeli da fotografies di Dis Europeics, coche da les caricatures de Manuel Riz y da les poejes de Rut Bernardi, che fova vegnudes mostredes y portedes dant enche a Neudrossenfeld. Chi che fossa enteressés de compré la publicazion, pò la damané do pro la Union Generela di Ladins (info@uniongenerela.it), al cost de 9,00 euro.



L president dla Union di Ladins de Fascia Fernando Brunel con Giusy Dezulian, vedova de Danilo del Garber.